

## Tiada warga Malaysia dalam nahas pesawat China Eastern Airlines

Oleh AMREE AHMAD  
22 Mac 2022, 7:31 pm



PUTRAJAYA: Kementerian Luar hari ini mengesahkan bahawa tiada warga Malaysia menaiki pesawat awam China Eastern Airlines yang terhempas di Wilayah Guangxi petang semalam.

Menerusi kenyataan di sini, Wisma Putra menambah pihaknya juga tidak menerima sebarang laporan rasmi mengenai ada rakyat Malaysia terlibat dalam nahas udara tragik berkenaan.

"Namun, Kementerian Luar menerusi Kedutaan Besar Malaysia di ibu kota Beijing serta Konsul Jeneral di Kunming dan Guangzhou masih memantau perkembangan insiden itu," katanya.

Pesawat malang penerbangan MU 5735 dengan membawa 123 penumpang itu dalam perjalanan domestik dari Kunming, ibu wilayah Yunnan ke Guangzhou, ibu wilayah Guangdong.

Kesemua mangsa termasuk sembilan kru dalam Boeing 737-89P itu disahkan terkorban apabila pesawat itu terjunam di Shenyang Bio, sebuah perkampungan di Wuzhou.

Media tempatan negara itu berkata, pesawat berusia tujuh tahun itu kelazimannya terbang antara Baoshan dan Kunming setiap hari namun dibatalkan kerana isu kekurangan penumpang.

Kali terakhir China merekodkan nahas udara ialah pada 24 Ogos 2010 apabila pesawat Henan Airlines penerbangan 8387 terhempas dekat lapangan terbang Lindu, wilayah Heilongjiang.

Mengulas lanjut, Wisma Putra berkata, bagi pihak kerajaan Malaysia, ia turut menyampaikan ucapan takziah dan simpati kepada pemerintah China dan keluarga mangsa yang terbunuh. – UTUSAN